

# Олна хот-хол ясрулхин төлө

Олн-амтнд нильчән өглгн -- Коммунистическ партин болн Советск правительствин эркн төрн болджана. СССР-н олн-амтнә эдл-ахун өслт дахад олн-амтнә бәәдл-джиргъл джил ирвас ясрад йовна.

Олна хот-хол ясрулх төрт парть болн правительств оньган даньгин өгцхәнә. Юньгад гихлә, олна хот-хол ясруллгн күч-көлсч олн улст туста. Хот уудг гер олн болхла, дакад тедн сәәнәр кәдлхлә кесг олн күүкд улст производствд кәдлх аргь учрана, олн-амтнд кергтә тоот эдл-ууш кедж гаргългьиг түргдүлнә.

Болв, мана Элст балгьснд бәәх хот уудг гермүдин кәдлмшт ик дуту-дундс бәәнә. Элстин, хот уудг 2-ч номертә герт үдин хот нег часин зуур күн уудж чадхш, эннь тегәд олн-амтнә күч-көлснә кедж гаргьгч аргь-эвд саалтган күргнә.

Ягьад эн иим болджахинь медхд зовлнъгта биш. Хот уухар ирсн улс түрүләд кассд зогсад, уух хотдан талон бичүлдж авчкад, дакад хотлагъан

идх өдмг авхин төләд буфетд оч чеерүдт зогсцхана. Буфетд ганцхн өдмг хулдхш, терүнд конфет, балта, консерв, колбаса, әрк, пиво нань чигн хот-хол хулдгдна. Энүндән кесг цаган үрәсн деерән ууртан бүтцхәдж, цогцан зовацхана. Эннь багь гисн кевтә, суух ормд чеерүдт зогсцхана, орм олад суусна хөөн хот авч ирдж стол деер тәвхиг күләцхәнә. Түргәр хот уудж гархд саалтг болдг дуту-дундс нань чигн бәәцхәнә. Тиим дуту-дундс Элстин наадк хот уудг гермүдәр чигн бәәцхәнә.

Деер келгдсн дуту-дундсиг балгьсна горпон гардачнр чигн, таньгьчин потребсоюзин гардачнр чигн медцхәнә, зуг эн дуту-дундсиг уга кедж, олна хот-хол ясрулхин тускар уха туньгьадж, бийсән зовацхахш.

Сүл цагт олна хот-хол бүрдәлгәнә халхд гарсн нүүрт йовгч шин эв-аргьиг олзлх кергтә. Эн юн шин эв-аргьв гихлә. Негдвәр, хотан бийснь оч авлгн. Бийснь хот оч авлгн гисн — хот уудг герт, хот уухар ирсн улс кассас талон

бичүлдж авчкад хотан бийснь оч авлгн. Тиим хот уудг герт официанткес керг уга, савсаньх хурадж авдг зуг негхн күн бәәх зөвтә. Хот кедг хорад хот өдгг хойр-гурвн терз гаргьх кергтә. Хойрдхла, өдмг талднь хулддгиг уурулх кергтә. Өдмгин үниг хотин үнд хамднь орулдж тоолад, блюд болгьнд хошад зун грамм өдмг өгх кергтә. Гурвдхла, олна хот уудг герт әрк хулдх зөв уга. Юньгад гихлә, хот уудг герин эркн төрн — хот уух улсиг шимтә, сән амтта хотар шулугьар тоодж гаргьх төр болджана. Тер цагт хот уухд 15-20 минут керглгдхмн.

Балгьсна тосхлтин кәдлмш икдсн учрар болн урднь бәәсн предприятьсиг өргдүлджәх учрар кәдлмшчнрин тонь сүл сармудт йир икәр өсдж одв, цааранднь чигн улм икәр өсх зөвтә. Тер төләд, кәдлмшчнрин шишлнъ хот уудг гер секх цаг ода ирв. Эн төриг түрүн болдж эрк биш кех төргидж тоолдж, даругьас күцәх кергтә.

БАДМИН Д.